

Ina chascharia per purs e giasts

Parpan: Emprima badigliada da la chascharia communabla

DA GION NUTEGN STGIER / ANR

■ **Sin l'alp dal Plantahof a Parpan vegn fatg or da l'ui gl da vatgas ina chascharia communabla. Per quella uschenunada «Schaukäserei» vegnan investads 2,3 milliuns francs. Il matg 2016 duai quella esser en funcziun.** En connex cun il project da svilup regiunal Curvalda vegn fatg or da la stalla da vatgas da l'alp dal Plantahof ina chascharia che duai er esser ina attracziun turistica. Las chascharias existentas da l'Alp Stätz e da l'alp dal Plantahof èn en decadenza e na correspundan oz betg a las ordinaziuns modernas. Quai èn be intgins aspects ch'ìls purs da Curvalda ed il Plantahof han decidì da construir ina chascharia communabla e quai en vista al project da svilup regiunal Curvalda. Il project da la nova chascharia custa 2,3 milliuns francs e da quella summa surpiglian confederaziun e chantun 800 000 francs. Ultra da quai vegn il project er sustegnì da l'Agid svizzer da muntozna e da blets donaturs privats.

23 tonnas chaschiel

En il bajetg existent, da passa 100 onns, vegn fatg la nova chascharia sin l'emprim plaun ed en il plaunterren il tschaler da chaschiel. Per quel intent è vegnida fundada la Societad d'Alp Parpan cun 18 commembers che han segnà 177 acczias a mintgamai 1000 francs. Il capital ester dad in milliun francs deriva entras in credit da la Societad d'alp Alp Stätz, la societad purila per credits e dad ina hipoteca. En la nova chascharia vegnan fatgas dals 230 000 kg latg 23 tonnas chaschiel d'alp. L'extern dal bajetg vegn strusch disfateg e pitschnas midas vegnan be fatgas tar la fatschada. La nova chascharia vegn er ad esser accessibla per visitaders e duai esser ina attracziun per vegl e giuven. Giasts ed indigens ed auters interessads han la pussaivladad d'observar co ch'ìl chaschiel vegn fatg ed er da prender invista dal tschaler da chaschiel. L'avertura da la chascharia publica duai avair lieu il matg 2016.



Uschia vegn la chascharia publica a Parpan a sa preschentar en stgars in onn.